

*Rev. Pöhl*

# EXAMEN CONCILII TRIDENTINI

PER

MARTINUM CHEMNICIUM

SCRIPTUM

SECUNDUM ED. 1578 FRANCOFURTENSEM, COLLATA EDITIONE A. 1707 DENUO TYPIS  
EXSCRIBENDUM CURAVIT, INDICE LOCUPLETISSIMO ADORNAVIT

VINDICIAS CHEMNICIANAS

ADVERSUS PONTIFICIOS PRAECIPUE ADVERSUS BELLARMINUM

AD CALCEM

ADJECIT

ED. PREUSS,

DR. PHIL. S. S. THEOLOGIAN EVANGELICAE LICENTIATUS, RAMQUE IN UNIVERSITATE LITT. BEROL. PRIV. DOCENS.



BEROLINI.  
SUMTIBUS GUST. SCHLAWITZ.  
1861.



# THEOLOGORUM ORDINI BEROLINENSI

*SUMME VENERANDO:*

E. G. HENGSTENBERGIO, C. G. NIEDNERO, C. J. NITZSCHIO,  
F. L. STEINMEYERO, A. TWESTENIO

VIRIS CLARISSIMIS

NOVAM HANC CHEMNICIANI EXAMINIS EDITIONEM

*GRATO DICAT ANIMO*

**EDITOR.**



# LECTURIS SALUTEM

J. N. J.

---

Centum quinquaginta quatuor anni lapsi sunt, ex quo ultima Chemniciani examinis Concilii Tridentini editio lucem adspexit. Quum autem jam libri exempla emi difficillimum esset, evangelicae theologiae amatores novam editionem parari optarunt. Quam ut pararem, duae potissimum causae moverunt. Primum, quem ipse inde fructum percepi, eum omnibus sanctae ecclesiae membris fore cupivi. Deinde quia novam cum Pontificiis pugnam instare videbam. Quam pugnam ut sustineamus, post acerrimum s. scripturae studium nil tam utile est quam Chemniciani examinis lectio diurna nocturna.

Fuit quoddam tempus, quo liber hiccine in academiis non modo assidue legebatur, verum peculiaribus etiam lectionibus quotannis explicari solebat.

Qui evangelicae theologiae peritus est, de libri pondere non dubitabit, qui dubitat, legat.

Quod ad consilium attinet, quo librum denuo exscribendum curavi, pauca addam: Omnes, quas vidi, examinis editiones mendis repletae sunt. Maxime ultima a Joanne a. MDCCVII curata. Nulla autem editione utendum nobis fuisse existimamus, nisi cum ab ipso Chemnicio revisa, tum mendis minus repleta. Non igitur editionibus Genevensibus, non editione Joannis.

Quatuor editiones Francofurtenses ante annum MDLXXXVI impressae restabant. Quarum princeps maxime scatet vitiis ut Chemnicus ipse fatetur.

Editio contra anni MDLXXVIII ut est ultimae, quae dicitur, manus, ita minus mendis obruta. Eam igitur exscribendam curavimus.

Libri concordiae locos juxta editionem Berolinensem laudatos singulis examinis articulis adjecimus. .

Quatuor examinis partes sigillatim proponimus, quintam addamus. Cujus haec erunt membra: Primum vita Chemnicii. Deinde libri impressi historia. Tertium Chemnicianae adversus Pontificios praecipue adversus Bellarminum vindiciae.

Qui legis, vale et fruiere.

*scr. Berolini feria tertia post domin. vocem jucunditatis. a. s. MDCCCLXI.*

**EDITOR.**

# EXAMINIS CONCILII TRIDENTINI

PER

D. D. MART. CHEMNICIUM

SCRIPTI

OPUS INTEGRUM QUATUOR PARTES

IN

QUIBUS PRAECIPUORUM TOTIUS DOCTRINAE PAPISTICAE FIRMA ET  
SOLIDA REFUTATIO, TUM EX SACRAE SCRIPTURAE FONTIBUS, TUM  
EX ORTHODOXORUM PATRUM CONSENSU COLLECTA EST,

*UNO VOLUMINE COMPLECTENS.*

AD

VERITATIS CHRISTIANAE

ET

ANTICHRISTIANAE FALSITATIS COGNITIONEM

PERQUAM UTILE ET NECESSARIUM.

1. JOH. 4.

NOLITE OMNI SPIRITUI CREDERE, SED PROBATE SPIRITUS, NUM EX DEO SINT: QUONIAM MULTI PSEUDOPROPHETAE  
EXIERUNT IN MUNDUM.

---

FRANCOFURTI AD MOENUM.

ANNO MDLXXVIII.





# INCLYTO ET SUMMAE SPEI

ILLUSTRISSIMO PRINCIPI AC DOMINO,

**D. ALBERTO FRIDERICO,**

**ILLUSTRISSIMI PRINCIPIS AC DOMINI,**

**D. ALBERTI SENIORIS, ETC. FILIO,**

MARCHIONI BRANDENBURGENSI, PRUSSIAE, STETINI, CASSUBIORUM ET VANDALORUM DUCI, PRINCIPI RUGIAE, ET BURGGRAVIO NORIBERGensi, ETC.

DOMINO SUO CLEMENTISSIMO:

*gratiam, pacem, salutem et benedictionem, a Deo Patre, propter filium, Dominum nostrum Jesum Christum, per spiritum suum sanctum.*

Illustrissime Princeps, Domine clementissime: Quod scriptum hoc complectens gravissimas disputationes de praecipuis doctrinae coelestis capitibus, in Tridentino Concilio conspurcatis et depravatis, Celsit. vestrae in primo adhuc aetatis flore agentis, demisse offero: ejus rei honestas et graves habeo causas, quas Celsit. vestrae illustrissimus parens, Princeps ac Dominus, D. Albertus senior, etc. Dominus meus clementissimus, pro eximia, et jam senili sua prudentia, ut spero, non improbabat. Homines sapientes, omnibus temporibus, gravissimo consilio censuerunt in formandis a prima statim aetate stadiis, vita et moribus eorum, qui ad spem Imperii nati sunt, et educantur, plurimum operae et diligentiae ponendum esse: quia κοινὸν ἀγαθόν, publicum et commune bonum sit talis Princeps, qualem sapiens antiquitas in pulcherrimo illo Homeri versu descripsit:

*ἀμφοτέρων βασιλεύς τ' ἀγαθὸς κατέσθης τ' αἰχμῆτης.*

Ut autem Dei beneficio tales evadant, valde multum interest Reipublicae, quali institutione a prima statim aetate formentur, et ad quae exercitia a teneris assuescant. Quae de re multa exstant sapienter cogitata, et venuste dicta, et apud Poetas, et apud Philosophos.

In Ecclesia vero filii Dei, Spiritus sanctus vult, Principes terrae non tantum ad politicas et bellicas virtutes formari, sed praecipue vult ipsos erudiri, ut serviant Domino in timore, et filium ipsius, Dominum nostrum Jesum Christum, a tenera aetate oculari discant, Psalm. 2. Utque sint benefici miserae et exulantis Ecclesiae nutritorii, Jes. 49. Pulcherrimum enim spectaculum, Deo gratum, Ecclesiae salutare, et ipsis Angelis opta-

tissimum esse David affirmat Psalm. 47. quando Principes populorum congregantur cum populo Dei Abraham, apud illos enim, qui sunt scuta terrae, Deus vehementer elevatur. Et Psalm. 102. dulcissimam facit hypotyposin: Scribantur haec in generationem alteram, quia prospexit de excelso sancto suo, Dominus de coelo in terram prospexit, in conveniendo populos et Reges in unum, ut serviant Domino. Ita 4. Reg. 11. Joas in domo Domini, apud Pontificem Jojadam educatur, et quidem in ipsa domo Domini, ritu augustissimo inauguratur, diademate capiti imposito, et libro legis in manus tradito: cum tamen septem tantum annorum puer tunc esset, cujus animus non poterat tunc quidem per aetatem omnia legis mysteria capere. Ab ineunte tamen aetate, judicarunt, Regii pueri animum imbuendum esse illis cogitationibus, ut meminisset in quam spem educaretur: ut scilicet non tantum privatim voluntatem Dei agnosceret, Domino serviret, et filium oscularetur: sed ut illa traditione libri testimonii commonefieret, publicam custodiam doctrinae divinitus patefactae, et in libris sacris consignatae, sibi, ut politico magistratui, certo modo et ordine a quibusvis depravationibus tutandam commendari.

Ita ex Christianis Regibus et Principibus multi bono consilio et pio zelo, liberos suos, in collegiis Ecclesiasticis, quae tunc scholae erant, et quasi plantaria Ecclesiae Dei, voluerunt educari: et a prima aetate ita institui et formari, ut reverentiam erga doctrinam Ecclesiae, in primo aetatis flore conceptam, postea in ipsa Imperii administratione retinerent et colerent. Et saepe in tali institutione Principum liberis propositi, traditi et commendati sunt libri, complectentes explicationes de gravissimis, contra sanam doctrinam motis controversiis. De quibus etsi per aetatem tunc judicare non poterant, admonebantur tamen traditione hujusmodi scriptorum, ad officium pii Principis, ad quod educabantur, pertinere, ut et privatim ab omnibus sanae doctrinae corruptelis serio abhorrent, utque suo loco lupos, afferentes alienam vocem, ab ovili arcerent et abigerent.

Cumque non dubitem, Illustriss. Ducem Prussiae, Dominum Albertum seniore, etc. Dominum meum clementissimum in hac gravi sua aetate, nihil aliud in votis habere, quam ut pia filioli et haeredis sui institutio et formatio, per Dei gratiam ita benedicatur, ut una cum diademate, etiam liber testimonii divini, ipsi recte tradi et commendari possit, utque in nutritione Ecclesiae, paternis vestigiis insistat. Judicavi igitur, Celsit. ipsius non ingratum fore meum hoc officium, ab ea gratitudine, quam Prussiae multis nominibus debeo, non alienum, si inclyto, et summae spei Celsit. suae filiolo, Domino Alberto Friderico, etc. Domino meo clementissimo inscriberem et offerrem, Examen hoc Decretorum Concilii Tridentini, quod certis rationibus ita flagitantibus conscripsi, ut cum aliud non possim, una cum precibus meis, commonefactione aliqua institutionem Illust. et summae spei Principis, etc. adjuvarem: ut Celsit. ipsius meminerit, in quam spem, non suae tantum Prussiae, sed toti rei literariae, et praecipue Ecclesiae educetur, utque progrediente aetate, discat et agnoscere, et odisse technas, et fraudes tyrannidis Pontificiae, et regni Antichristi.

Non autem privato vel consilio, vel arbitrio, hoc argumentum grave sane, et difficile, mihi delegi, sed quodammodo necessitate quadam mihi impositum est. Edidi ante biennium libellum proponentem, et quasi in tabella monstrantem praecipua capita Theologiae Jesuitarum: quae ex quadam ipsorum censura collegeram, ut nova ista regni Pontificii secta, Germaniae nostrae detegeretur, quam monstrosas opiniones profiteatur et circumferat. Ad illum libellum vero, ne ex Jesuitarum quidem secta hactenus quisquam responsionem instituere voluit, credo quod nemo turpitudinis istius publice detectae patronus haberi voluerit. Tandem Andradius quidam Lusitanus, qui inter Theologos Tri-

dentini Concilii praecipuam personam sustinuit, ad profligandum illum exiguum meum libellum, magna et proluxa acerbitate exarsit. Idque non suo quodam vel instituto, vel arbitrio, sed (sicut ipse narrat) eorum instigationibus inflammatus, quorum Tridenti in Concilio praecipua fuit autoritas: cum quidem (sicut ipse narrat) multorum sermone cognoscerent, aliqua nostrorum gratulatione, libellum istum meum fuisse exceptum.

Jam vero ad primam inspectionem, scriptum illud Andradii, propter acerbam et tumidam maledicentiam, cum quidem in rebus ipsis ad profligatas Jesuitarum opiniones, majorem et crassiorem ipse addat impudentiam, statueram prorsus silentio praeterire. Sed cum attentius, res ipsas, quas Andradius tractat, considerarem, deprehendi ipsum quasi aliud agendo, voluisse simul mysteria quaedam, quae Tridenti in privatis congressibus et deliberationibus agitata sunt, in lucem producere. Cumque illam personam, a Tridentinis patribus sibi impositam fuisse, ipse narret: existimo, voluisse Pontificios, post promulgata et edita impia sua decreta, etiam interpretationem illorum orbi Christiano tradere. Atque hoc modo ex illis Andradii explicationibus animadverti, quam multae technae, et quam variae fraudes, in Tridentinis decretis insidiosae occultentur, de quibus Lector vix suspicari posset, si obiter nuda decreta inspiciat.

Cum igitur omnino responsio aliqua opponenda esset, judicavi hanc rationem, quae cum aliqua Lectoris utilitate conjuncta esset, fore commodissimam: si ex Andradii scripto, quod Tridenti durante Concilio, hortatu et instigatione Patrum compositum erat, exciperentur ea, quae decretis Tridentinis talem interpretationem addunt, unde non obscure colligi potest, quae ibi dictae sententiae, quae agitatae deliberationes, ad depravanda praecipua doctrinae coelestis capita. Et hac occasione institui Examen primae partis Decretorum Concilii Tridentini, usque ad doctrinam de Sacramentis. Altera vero pars, si occupationes permiserint, et Ecclesiae utilitas efflagitarit, Deo bene juvante, subjungetur. Cognoscet autem Lector, ex commonefactione hujus examinis, ex quam insidiosis technis et fraudibus consuta sint Tridentina decreta, hoc consilio et hoc fine, ut usitatae adulterationes, quas ex Philosophia male et infeliciter cum Theologia dilutas, Monachi in Ecclesiam invexerunt, quoquo modo, et invitis et Deo et hominibus, retinere, confirmare et stabilire possint. Adjeci in plerisque locis fundamenta explicationum et refutationum, quantum quidem instituta examinis ratio tulit. Locum vero de Scriptura et Traditionibus, quia in eo Pontificii totius suae causae robur et praesidium, hoc quidem tempore, collocant, aliquanto plenius justa ferme tractatione explicavi. In tota autem hac descriptione, nihil conatus sum novi afferre, sed tantum antiqua, hoc est, usitatam nostrarum Ecclesiarum doctrinam repetere, quam non dubito esse Prophetica, Apostolica, et vere Catholica consensionem. Sed de consilio scriptionis, in ipsa praefatione plura dicenda erunt.

Nunc igitur, Illustrissime Princeps, Alberte Friderice, etc. ad Celsit. vestram revertor, quam reverenter et demisse oro, ut clementer audiat, quibus rationibus motus, scriptum hoc Celsit. vestrae inscribere et offerre voluerim.

Adversarius meus Andradius, explicationes suas, quas ita inscribit: Serenissimo Regi Lusitaniae, etc. cujus adolescentia, in primo aetatis flore, sub Jesuitarum disciplina, referente Andradio, instituitur, destinavit, ut scilicet tenellus Regis animus, si a Scriptura ad humanas traditiones abducatur, et superstitionibus Pontificiis ab ineunte aetate undique fascinetur, non possit aliquando progredi ad fraudes Pontificias agnoscendas, et veritatis lucem aspiciendam. Cogitavi igitur justiores me habere causas, ut simili inscriptione, seu dedicatione, nostros Principes, qui in primo aetatis flore, in illa simplici et fundatissima doctrina, quae a Deo generi humano patefacta, et literis Prophetis et Apo-

stolicis consignata est, educantur et instituuntur, commonefacere et exhortari, ne si quando ad Reipublicae gubernacula admoti fuerint, patiantur se et suos a manifesta et salutari Scripturae luce, ad tenebras et figmenta humanarum traditionum, et scrinii Pontificii somnia abduci. Vestrae autem Celsit. illustrissime Princeps, Alberte Friderice, etc. potissimum judicavi me hoc quaecunque officium jure quodam debere. Multis enim et magnis ab illustriss. Celsit. vestrae parente, etc. Domino meo clementissimo beneficiis sum affectus, quando instructissimae Ducali Bibliothecae ante annos tredecim praefectus, honestum in Aula locum habui. Exercitia etiam mea in Mathematicis qualiacunque Celsit. ipsius non ingrata fuerunt.

Et cum ad pertexenda studia mea ad Academias redire vellem, honeste, et quidem liberaliter a Celsit. ipsius, et literis, et donariis dimissus sum. Pro quibus beneficiis, judicavi me hac ratione animi gratitudinem commodissime, vel aliquo saltem modo significare posse: si hac inscriptione ostenderem, me illustriss. filio et haeredi Celsit. ipsius, omnia fausta et felicia precari, in iis praesertim, quae summa et maxima sunt in hac vita, ut scilicet juxta Spiritus sanctus sententiam, primis assuescat ab annis, servire Domino in timore, et osculari filium, Psalm. 2. congregari cum populo Dei Abraham, Psalm. 47. suscipere nutritionem Ecclesiae, Jes. 49. odisse Ecclesiam malignantium, Psalm. 26. Et hanc meam operam spero Celsit. ipsius non minus gratam atque adeo pro rerum aestimatione gratiorem fore, quam cum olim qualiacunque Mathematicum exercitia, Celsit. ipsius exhiberem: quae tamen memini, singulari Clementia accepta fuisse. Volui etiam gratitudinem meam pro illo beneficio ostendere, quod in Bibliotheca instructissima, per triennium et amplius, non sine fructu mihi versari clementer concessum fuit. Illa enim occasione accensus sum studio linguarum, et amore cognoscendae verae et purioris antiquitatis. Merito igitur, cum debita gratitudine, Prutenicae Bibliothecae acceptum refero, quantulumcunque est, quod postea in hoc studiorum genere profeci.

Saepe etiam illius humanitatis recordor, cum in Aula quidvis potius quam aulicus, per triennium ferme versarer, quod illi, qui in Aula praecipui erant, ad amicitiam suam honestum et liberum aditum mihi patere volebant. A Domino Burggravio, propter modestiam et simplicitatem amabar, et quidem liberaliter fovebar, Nobili viro et Casparo Nosticio, Doctori Christophoro Jonae, Consiliariis, Andreae Muncero Secretario, non ingrata erat mea consuetudo, et quidem multis in rebus opera ipsorum saepe utebar: qui etiam absentem benevolentiae officiis prosecuti sunt. Nec opus est singulos nominare, quorum in Prussia et amicitia usus, et benevolentiam expertus sum.

Cumque aliud non possim, existimavi me vel aliquam gratitudinis significationem Prussiae ostendere posse, si publica hac declaratione et commonefactione testatum facerem, me ardentibus et summis votis, institutionem et formationem, ipsam denique vitam et salutem, inclyti et summae spei Principis ac Domini, D. Alberti Friderici, etc. divinae gratiae et benedictioni commendare.

Vestram vero Celsit. Illustrissime Princeps Alberte Friderice, etc., Domine clementissime, reverenter et demisse oro, ut non aegre ferat, quod per vestram Celsit. volui gratum meum animum, erga illustrissimum Celsit. vestrae parentem, etc. Dominum meum clementissimum, et erga totam Prussiam, publica aliqua significatione declarare. Erit hoc Deo gratum, et Celsit. vestrae honorificum, si in primo aetatis flore, exemplo illustrissimi parentis, coeperit ostendere, et spem praebere, se patrocinium rei literariae et nutritionem Ecclesiae, una cum reliqua haereditatis successione, suscepturam. Et hac bona spe fretus, Celsit. vestrae offero et dedico hanc meam qualemcunque operam, quam eruditorum, et in his illustrissimi Celsit. vestrae parentis, etc. judicio gravissimo submitto,

reverenter et demisse orans, ut quicquid hoc est officii, Celsit. vestra, placido vultu, et clementi animo accipere non dedignetur.

Deum Patrem Domini nostri Jesu Christi toto pectore et ardentibus votis oro, ut propter filium suum, Dominum nostrum Jesum Christum, Celsit. vestrae institutionem et studia, totam denique vitam et salutem, divina sua gratia et benedictione, per Spiritum suum sanctum gubernet, ab omni periculo et malo incolumem clementer conservet et custodiat, et benedictione sua efficiat, ut Celsit. vestra esse aliquando possit organon Deo gratum, politiae utile, et Ecclesiae salutare, Amen.

Brunsuigae, Anno Domini M. D. LXV. die Aprilis 29. quo die Deus Celsit. vestram in hanc lucem nasci voluit, quem etiam toto pectore oro, ut illum diem Celsit. vestrae faustum, felicem, et salutarem saepissime redire velit.

Celsit. Vestram

reverenter et demisse colens,

MARTINUS CHEMNICIUS,

Minister Ecclesiae Brunsvicensis.



# NARRATIO DE SYNODO NICENA

## VERSIBUS EXPOSITA

AUCTORE

MATTHIA BERGIO, Brunsvicensi.

Nunc tandem pietas multum laudata supremi  
Pontificis perfecta dedit, quas tempore longo  
Parturiens nobis specie ostentabat inani:  
Nunc tandem Alpina coeptum (quis nescit) in urbe  
Concilium Latia de religione peractum est.  
Hei mihi quale fuit, quantumque recessit ab illis,  
Quas sancti quondam, mundi melioribus annis,  
Egerunt proceres, cum nondum adjuta nocentum  
Fraude superstitio, doctrinae tradita sensim  
Carpere Apostolicas furtis audacibus orsa est:  
Cum nondum sanctis priscorum moribus aetas  
Decolor invexit virus: segetique malignum  
Triticea lolium atque aconita nocentia furtim  
Miscuit ille nocens lacrymabilis arbiter Orci.  
Hei mihi quale fuit, quantumque recessit ab illo,  
Quod quondam Solymis duodena coegerat altis  
Turba: rudes populos dum Christo hinc inde laborat  
Jungere, sollicitaque haec providet omnia mente.  
Quae poterant coeptis obstare ingentibus, illo  
Tempore, messis adhuc tenera cum stabat in herba  
Christe tibi, et multi gressum in tua castra ferebant.  
Quid? quam dissimile hoc rebus fuit omnibus illi,  
Quod quondam ex omni princeps longe optimus aevo  
Eximio Christi pietatis amore coëgit,  
Contra hunc, quem Martis de nomine dixit Arium  
Graecia, qui Christi nomen dum perfidus ore  
Abnegat impuro, tibi maxime Constantino  
Aeterna obicit laudandum in secla laborem.  
At tibi, complicitibusque suis, aeterna nocentum  
Supplicia infelix, omnique miserrimus aevo:  
Quando hostili animo Christum insectatus, et inter  
Blasphemus contra hunc voces animam exhalavit.  
Haec jam Pierio mens est mihi promere cantu  
Non tamen, ut rerum momenta per omnia pergens  
Singula commemorem, dici haud indigna: laboris  
Ingentis res illa foret: mihi parva loquenti  
Sufficit ad plenos lectorem mittere fontes,  
Mi est erit, parvo indicio monstrasse legenti,  
Quam simile hoc illis fuerit, quas diximus ante,  
Conciliis, Latii studio quod praesentis actum est.  
Nimirum ut Nemesi similem patet esse Lavernam:  
Laida Penelopae: Venerem tibi casta Diana:  
Gorgonas Harpyasque tibi Orithonia virgo.  
Dum tamen istud ago, numeris dum talia promo,  
Bequias erit Musis qui non aversus, opellam  
Comprobet hanc, venae censor minus asper agrestis?  
Tu quam respexit vultu supremus amico  
Jam pridem pater, et lucom cui reddidit illam,  
Quam tenebris olim et caligine tæxerat atra  
Vana superstitio, et pietati inimica Tyrannis,

Saxonica Arctoi non ultima gloria tractus:  
Tu mecum facilis coeptum percurrere laborem:  
Dum decus egregium, dum facta ingentia condo  
Principis, insignis magnum Constantia nomen  
Cui dedit: et poenas etiam, quas solvit Arii  
Impietas, alto dum bellum intentat Olympo:  
Et Christum vanis oppugnat perfidus armis.  
Vos quoque quos etiamnum hac tanta in luce tenebrae  
Impietasque juvat blasphemi insana Papatus:  
Ibida qui turpem Romanae sedis honore  
Afficiis superum (sive huc vos impulit error,  
Sive auri malesuada fames, seu fulgor honorum,  
Praestringit captis oculos) huc vertite mentes,  
Huc animos, non quis dubitet, quin impia facta  
Tristibus exemplis, quantumvis tardus ad iram  
Sit pater ulturus, quando bonitate videbit  
Esse nihil patria, monitis nihil omnibus actum.  
Aspiciote animis, quanto divina furore  
Ira vel hunc ipsum, de quo mea pagina dicet,  
Presserit: informi demissum ad Tartara leto:  
Ut vel sic vobis mentem sententia mulet  
Sanior, et morti vos eripiat et Orco.  
Sed nos jam vento pandemus vela vocanti.  
Ergo hic, cui clarum dederat Constantia nomen,  
Primus in Imperio magno te Christe professus  
Romulidum fuit, et cultus portenta profani  
Sustulit, et vitas populos melioris in usum  
Formavit, passim vanos dediscere cultus  
Hortatus, Christumque animis Christum ore fateri.  
Dum tamen illud agit, Christo dum militat ille  
Quas rerum discrimina pertulit? o quibus ille  
Jactatus fatis, quae bella exhausta per orbem  
Confecit, diros veri dum numinis hostes  
Europa atque Asia pulcos sequiturque premittitque,  
Et jam complures saevissima monstra Tyrannos  
Sustulerat victor ferro, rerumque potitus  
Regnum instaurabat Christo fortissimus uni:  
Et rectos cultus, et justa capescere sacra  
Jusserat, et vanos ritus et vana priorum  
Orgia vastatis passim submoverat aris.  
Ille animas Christo dociles, non exta parare,  
Non ullas pecudum fibras mandaverat ille,  
Antiqua quicquid reliquum de sorde manebat  
Exstirpare omni penitus ratione parabat.  
Neo mora: crudeles rabies Acherontica sensu  
Invidias stimulos, dirisque ultricibus acta,  
Artis opem ad solitas decurrat: sollicit illam  
Hoc super interitu sacrorum artisque nefandae,  
Millia quae tam multa hominum Phlegethontis avari  
Intulerat regno, super hoc tum sollicit illum

Iras indignantem immanes curaeque coquebant.  
 Ergo ille Arium, quo nemo peritit esset  
 Perturbare animos, vario mala pingere fuco  
 Dogmata, et externo pietatem fingere gestu,  
 Excitat: infandos illum exhortatur ad ausus  
 Vipeream inspirans ad coepta immania mentem.  
 Viderat ille quidem, non vano fulmine dogma  
 Defectum, ad multos quod propugnauerat, et quod  
 Scitis exornatum verbis atque arte magistra  
 Protulerat, librisque et crebra voce puerum  
 Damndri: ipse adeo Phœria jam pulsus ab urbe,  
 Diversa exilia, et non notas quaerere terras  
 Actus erat: mox illi iterum nova furta paternae  
 Artis adornantur: rursus sua dogmata verbis  
 Pingit, et his populo fucum facit impius omni,  
 In partesque suas multos trahit, et sua furtim  
 Insinuat, motumque animis dubitantibus addit.  
 Praesul Alexandri clara tum primus in urbe  
 Vixit Alexander: qui cum vidisset, Arium  
 Non esse hunc hominem, quem paz tranquilla iuaret:  
 Quem pia Simplicitas intra sua septa teneret:  
 Sensissetque adeo, quid moliretur et istia  
 Quid strueret coeptis: quem, si fortuna faveret,  
 Eventum cuperet rerum, mox omnia pandit  
 Constantine tibi: tua supplex provocat usque  
 Auxilia, adversus caput insanabile vani  
 Lymphatique viri, qui fastu insanus et ira  
 Aeternum Christi numen neget ore protervo:  
 Nec vero ille hoc iudicium neglexit: adire  
 Ad seipsum turbae auctorem sociosque iudebat:  
 Dicturos magnam magno sub iudice causam.  
 Affuit ille ultro, et regem nil tale videntem  
 Circumit, dum animum nunc hic, nunc occupat illic,  
 Insinuans sese: vitiumque occultat, et omni  
 Principis assensum captat ratione benigni.  
 Sicut erat veri fallax simulator, et arte  
 Instructus stygia, qui fando reddere nova  
 Candida de nigra, et de candidis atra.  
 Heu nimium faciles aures tum praeiit illi  
 Mitis adhuc princeps, latebrosi et pectoris artes  
 Ignorans huius, quo non astutior unquam  
 Decepit mentes hominum, monstroque fefellit,  
 Atque ideo ignarus fraudumque dolique latentis,  
 Ad sua mox iterum incolumes salvoque remittens  
 Pacem optate viri, pacem colite, inquit, et iras  
 Ponite, dissidiisque aditus ocludite cunctis.  
 Jungite amicitias, et foedera pristina rursus  
 Purgatis renovate animis, et utrumque foete  
 Concordes: ne vos odiis certate nefandis.  
 Aspicite hoc passim, quo machina foedere sese  
 Tota liget mundi: quaque omnia lege per aevum  
 Conspirent Elementa sibi, faveantque vicissim:  
 Aspicite, ut parvos felix concordia coetus,  
 Ut parvas locupletet opes: cum maxima regna  
 Funditus illa noceat toties discordia vertat.  
 Ah coeant iterum, coeant in foedera dotrae.  
 His alii quoque illos princeps laudatus amorem  
 Depositis renovare odiis exhortabatur:  
 Cuncta prius tentanda putans, sed vana fuere  
 Illius hortamenta: adeo neque causa ferebat  
 Concoardare animos: imis nec fixa medullis  
 Ambitio elatum passa est requiescere Arium.  
 Ergo novis iterum pingit sua dogmata fucis  
 In partesque suas nunc hos, nunc pertrahit illos.  
 Optimus at princeps conceptam gliscere pestem  
 Dum videt, et studiis certamina crescere sentit:  
 Multa suo super his tristi cum corde volutat.  
 Dumque alius medicas adhibere ad vulnera nemo  
 Instituit potestae manus: se poscit ille,  
 Se signari oculis censet, ne noxia pestis  
 Corripere coetum, de quo grassantia pridem  
 Arma Tyrannorum dextra victricis fugarat.  
 Multa alternanti potior sententia visa est  
 Cogere Concilium, quo res ratione modoque  
 Legitimo discussa pateceret, licet omnes

Convocat ex omni terrarum parte magistros  
 Christiadam, pietas quos et doctrina celebres  
 Efficeret passim, qua sol utrumque recurrans  
 Aspicit Oceanum, qua lucida tollitur Arcos.  
 Quaque dies medius flagrantibus aestuat horis.  
 Nec tantum edicto rem publicat: omnia curat  
 Insuper aerti coeptis obstantia: neu quis  
 Molirive moram, aut venienti neectere causas  
 Posset, praebere currusque rotasque volucres  
 Mandat, quas praesto passim venientibus essent.  
 Nec mora, diverso passim se ex orbe ferebant  
 Tam variis linguis, habitu quam vestis et ore  
 Dissimiles: aderant Graeci, Thracesque Phrygesque,  
 Indi, Arabes, Crætes, terraeque Libyssae nati.  
 Adfuit et Scythici procerior accola Ponti,  
 Germanusque ingens, et glebae cultor Iberae.  
 Ille valens usu rerum arbitrioque sagaci:  
 Ille ministerio linguarum atque arte magistra:  
 Hic arcana bonus scripturae evolvere sensa  
 Ad normam fidei: donis ingentibus omnes  
 Conspicui: et multis super omnes dotibus aucti,  
 Festinant omnes iussi, rapidisque feruntur  
 Passibus, haud illi tantum, quibus integer aevi  
 Sanguis erat: multi senio tardante gravati  
 Conveniunt, ultra vires sortemque senectae.  
 Qua celebrem tellus vidit Bithyna Niceam:  
 Urbem olim, sed mox deletae triste cadaver  
 Urbis et exemplum divinae terrae iras.  
 Hic tum cernere erat crines incanaeque menta  
 Multorum, quos ante odiis crudelibus omni  
 Terrarum tractu rabies Acherontica multo  
 Vexarat fastu, atque odiis agitarat amaris.  
 Cernere erat toto laceratos corpore quosdam:  
 Lumine multatos alios: pro religione  
 Christo tua, et verae qui pro pietatis honore,  
 Mitebant charas in aperta pericula vias  
 Pridem animas, quando diris subjecta Tyrannia  
 Cracebat mira pietas imperdita forte.  
 Divini vero proceres atque inclyta postquam  
 Hinc atque hinc collecta loco convenit in uno  
 Concilio, coepti ipse ingentis auctor  
 Constantinus adest: non ille satellite multo  
 Terribilis, non ille armis metuendus et ense:  
 Non torvus vultu, sed tantum simplice cultu  
 Conspicuius, fidesque aliquot comitatus amicis  
 Ingreditur, non tam sublimibus alta columnis,  
 Non tam auro gemmisque aut Indo splendida buxi  
 Limina, quam tali multum veneranda Senatu  
 Ingreditur, facilesque oculos fert omnia circum:  
 Et solio tandem medius conqredit in aureo.  
 Atque ibi facundo dum cunctis explicatore,  
 Quae causa, aut quae res pro tempore suaserit illud  
 Cogere Concilium, quantae sibi singula curas  
 Sint, quas Christo tuum possent extendere regnum  
 Ostenditque petitque adeo, quando optima rebus  
 Haec dubiis medicina foret, ardentibus omnes  
 Numinis aeterni votis sine fine petendo  
 Auxilium, controverso de dogmate certo  
 Constituant: et quando ipse, quocunque mederi  
 Afflictis possit rebus tentare viderent,  
 Unanimes itidem partes explorare studerent  
 Quisque suas: Christo ut passim sua gloria constet.  
 Atque ait: Haec summa est votorum tota meorum,  
 Dogmatis unanimis, et consentanea veri  
 Copula nos nectat: Deus haec incoepa secundet,  
 Cui soli veros passim instauramus honores:  
 Ut videant homines coelestis libera regni  
 Incrementa, et magno Ecclesia floreat auctu.  
 Quantis nos odiis ille immanissimus hostis  
 Oppugnet: quantis hoc egerit haecenus unum  
 Viribus, ut sacros corrupto dogmate coetus  
 Turbare, Christo cunctos arcere laborans,  
 Omnia nota satis, neque nostras vocis eget res.  
 Huic ergo divinam Christi defendere laudem  
 Conatus vitamque meam, studiumque laboresque



Opposui, te summe Pater, te scilicet uno  
 Confusus, propter te perdere cuncta paratus,  
 Aut tibi cuncta uni dextra asserturus et armis.  
 Nunc nos diversa (quis non videt?) impius ille  
 Aggreditur ratione, malum dum dogmata fraude  
 Invehit insincera, animos quibus occupet, atque  
 Corruptos tristi secum demergat Averno.  
 At vos, quos charo pastor supremus oculi  
 Custodes dedit esse, et quos huius pabula Christus  
 Mandavit monstrare salubria, vos modo poscit  
 Tempus, vestrae operae, vestri nunc haec studii et res.  
 Proinde adhibete animos, ne verbi nobile donum  
 Arbitrè obscuret nigri saevissimus Orci.  
 Biblia sunt vobis: sunt scripta Prophetica vobis,  
 Sunt et Apostolorum signata volumina verba.  
 Scilicet his pater ipse deum se lumine largo  
 Conspicuum dedit, et quod de se scire necesse est  
 Humanas mentes, totum hac in parte reclusit.  
 Et ratio ipsa adeo doctrinae est omnibus una  
 Temporibus, pariterque eadem sunt ante professi  
 Cum proavis vales sancti, duodecunque turba.  
 Haec sunt certa, suo haec vis ordinis nulla movebit.  
 Illorum ad normam doctrina tradita quaeque  
 Exigere et sacros rectum est inquirere fontes,  
 Nec fas est cuiquam norma discedere ab illa  
 Dogmate diverso: quoniam hic seque et bona cuncta  
 Exhibuit pater, et manifesta in luce retezit.  
 Quare agite, ex animis nunc, o nunc pellite vestris  
 His quodcumque potest coeptis obistere, cesset  
 Certandi studium: contentio vana facessat,  
 Iurgia sint iraque procul, perquirite iusto  
 Veracis cuncti rem totam examine lanceis:  
 Neve sinite incassum vestros cecidisse labores.  
 Nimirum felix mihi terque quaterque videbor  
 Tum demum, cum vos animis concordibus uno  
 Aeternae aspiciam Sophiae coalescere nexu.  
 Haec et plura illos multa gravitate monebat,  
 Ipse etiam quaerentium inter media agmina totos  
 Continuare dies: ipse autem intendere cunctis  
 Attentam, studioque exquirere cuncta sagaci,  
 Libera quin etiam cuncta hic ora jubebat  
 Concedi, et quaecumque animo sententia cuique  
 Sedisset, liquido, nullo impediante, volebat  
 Proferri: veri quando indagatio linguas  
 Neutiquam vincitas, sed libera posceret ora.  
 Nunc tamen est aliquis, cuius vesania et excoers  
 Impietas prohibere audet, ne dogmata quisquam  
 Executiat mundo quae dudum obtruserat omni  
 Impia barbaries hujus, qui regna supremi  
 Aeternique Dei furto labefacta et arte.  
 Qui supra reges se tollit et omnia mundi  
 Imperia, et fastu tumidus late omnia complet  
 Barbarico: atque illos audax sibi poscit honores,  
 Quos homini operare nefas, oelsoque superbus  
 In solio superum dicit convicia regi.  
 Non erat hoc animi tibi Constantine, nec unquam  
 Te prohibente fuit cuiquam non libera fandi  
 Copia, dum verax prolata explorat amussis,  
 Et trutinæ justo doctrinam examine pensat  
 Concio sanctorum non illaudata virorum.  
 Non praepjudicio damnavit acerbior ulla  
 Alterius causam partis, non priorior ille  
 Alterius vius, iustoque faventior unquam  
 Addidit injuste vires et robora causae.  
 At cum legitimo tandem res sine fuisset  
 Clausa, atque hanc normam, quam oculis dedit ipse  
 Aeterni interpres, et imago aeterna Parentis,  
 Omnia discussa: et cunctis jam cognitum esset  
 Martigeræ furor, et rabies manifesta cohortis:  
 Non tunc illi animus, non tunc constantia iusta,  
 Laudatus non tunc deerat rigor, sicut ille  
 Convictos, et adhuc firmata mente foventes  
 Erroris commenta sui non munere tantum  
 Privavit, sed et extorres ignota coëgit  
 Exilia et terras alio sub sole jacentes

Quaerere, nec costu se permiscere piorum.  
 Ut reliquos fidei mox consentanea junxit  
 Formula, multorum quae post quoque sustulit una  
 Materiam errorum, et dubitantia pectora saepe  
 Expedi, dum Christum hominem probat esse Deumque  
 Veraque Theseo monstrat compendia filo.  
 Exin se cuncti perfectis rebus ad urbem  
 Quisque suam referunt, quos ille hortatibus omnes  
 Mitibus appellans, animis concordibus unam  
 Doctrinae vocem mundo inculcare jubebat:  
 Inque propaganda doctrinae voce laborem,  
 Et studium acre Deo vigilanti mente probare.  
 Tum vero infirmos omni ratione juvando  
 Allicere ad Christum, pro re, pro tempore cunctis  
 Consulere, atque omnes sanandi quaerere causas.  
 Sicut qui medicum tractat cum laude laborem,  
 Pharmaca debilibus, si quando salubria miscet,  
 Diversa diversa adhibet medicamina: non hic  
 Ingratis semper succis medicantia miscet  
 Pocula, non aloes lignum, aut absinthia semper  
 Tristia praebit, non acilicet omnibus ille  
 Ingratum tetra Coloynthide temperat haustum.  
 Est etiam suavi laticem cum nectare prudens  
 Inficit, et condit fragranti caetera melle.  
 Non aliter Christo quosdam esse adungere rectum  
 Mitibus alloquitur et commoditate ferebat,  
 Quos tamen infirma dociles cum monte viderent:  
 Ut tandem ipsi etiam vici bonitate piorum,  
 Consilia in melius referant, Christumque sequantur.  
 Hinc petit, ut precibus votisque ardentibus omnes  
 Commendare velint superum sua regna parenti.  
 Quando tot insidias videant, tot furta per orbem,  
 Monstraque non leviter sanctis obstantia coeptis.  
 Ille viam monstret, rem providus ille gubernet:  
 Vimque dolosque premat, quos passim immunda malorum  
 Agmina spirituum miscet. Hinc munera cunctis  
 Distribui non parva jubet, prout quemque decebat,  
 Nemo adeo tanto numero indonatus abibat:  
 Neglectus nemo est, aedes sed jussu ubique  
 Templaque Christianis refici, furiosa priorum  
 Impietas regum quae passim everterat, et mox  
 Munificus largos tribuit super omnia sumtus  
 His, rude qui possent vulgus formare docendo.  
 Felix o nimium felix clarissime princeps:  
 Tantorum felix operum, dignissima fama  
 Aeterna et nullis intermoriendo diebus.  
 Parcere subjectis et debellare superbos,  
 Heroae virtutis opus, sed gloria major  
 Aeternum Christi in terris extendere regnum,  
 Dogmataque invicto divina labore tueri.  
 Hoc decus est tanti, quanti non omnia mundi  
 Totius ornamenta forent, si congerat uno  
 Illa loco seu fors, seu quis deus, hinc tibi majus  
 Enatum decus est, quam quod capitolia curru  
 Tarpeiasque arces aurato invecus ab omni  
 Laudatus populo parta de pace fuisti,  
 Terribiles Scythicas duceus feritatis alumnos,  
 Ante tuos victor currus, Dacumque Getamque.  
 Nam quod Threiciis populatus Sarmata tractus  
 Te victore cadit, mutatoresque domorum  
 Gothosque Dacosque truces dare terga coëgit  
 Militiae labor ille tuas: quod foeta triumphis  
 Innumerabilibus tibi laurea contigit, et quod  
 Naufragio tristi convulsum colligis unus  
 Imperium, et laceras refici tabulata carinas:  
 Sumi haec magna quidem, sed enim communia tecum  
 Constantine haec sunt multis, neque gloria summa  
 Hinc tibi, sed vita tantum quae clauditur ista  
 Provenit, major longe tibi nascitur inde  
 Verarum series laudum, tua provida cura  
 Numinis aeterni cultum quod juvit, et alium  
 Aseruit fidei decus, et venerabile donum,  
 Represitque nefas, neque vero hoc almus Olympi  
 Neglexit Rector, per bis tria lustra quietum  
 Imperium tibi concedens, natusque paterni

Inconscia itidem tradens insignia regni.  
 Atque Christum ausi verbis lacerare vel armis,  
 Infelix miserumque genus natosque nepotesque  
 Exilio secum aeterno implicuere cadentes.  
 Felix o nimium felix clarissime princeps.  
 Ut vero canos frigescentemque senectam  
 Attigit, ab veris labes mala laudibus haesit.  
 Quando illum, cuius toties deprensa fuere  
 In superos superumque ipsum convicia regem,  
 Exilio revocat sive illud pacis et otii,  
 Tunc ipsi subiecit amor, sive altera causa,  
 Sive obliata sui senio fuit inclyta virtus  
 Principis eximii, sive haec tum cuncta peregit  
 Occultae studium sectae, quo tempore Caesar  
 Decubuit, morbo fractus, fractusque senecta,  
 Ut potius reor, et potius fas credere duco:  
 Tunc igitur toties jam condemnatus Arius  
 Rursus ab exilio Byzantii ad moenia venit,  
 Auxilio sociae occulto studiisque catervae  
 Subnixus: stimulis jamque exagitata sinistra  
 Praecipuos illi spondebat factio honores.  
 Indoluit senior, quem non pietatis egentem  
 Non animi, non virtutis pia concio summum  
 Sacrorum et verbi custodem hac urbe fovebat.  
 Opposuit sese ille viris, neque velle ferebat,  
 Coetibus adjungi sanctis, quem tota piorum  
 Concio seu pestem dudum averata fuisset,  
 Nuncque etiam damnet sontem, sic ille bidentum  
 Sollicitus custos cum torvum et acerba tuentem  
 Semit addece lupum, clamorem protinus edit,  
 Praedonem contra dirum, dum fida canum vis  
 Assiliens, hostem toto petat improba campo.  
 At magis atque magis stimulis agitata sinistra,  
 Factio pergebat coeptis instare nefandis,  
 Caesaris Imperiis illuc jussuque vocatum  
 Esse virum memorans, sacris qui ibi praesit et arie.  
 Ausi quietiam voces jactare superbas,  
 Invito sono invitis etiam omnibus, illico  
 Hunc unum templis sacris hunc praefore et arie.  
 At pius et Christi observans super omnia Praesul  
 Obstitit uaque animo, et ne coepta nocentia dirus  
 Perficeret furor, et sacrum infestaret ovile  
 Horribili contagio lues damna, supremum  
 (Quando opis humanae nil jam superesse videbat)  
 Sollicitare patrem precibus, prohiberet ab illa  
 Coetum labe eum, vim frangeret insidiasque,  
 Aut sese ad requiem potius finemque laborum,  
 Corporis exutum vinculis, dimitteret, ante  
 Quam coetum inficeret contagio foeda suorum.  
 O quos hic gemitus, o quae suspiria ab imo  
 Pectore tum dedit, o quanto est ardore precatus.  
 Omnem adeo exegit somni sine munere noctem,  
 Cum veniente die sua perfecturus Arius  
 Coepta, palam populo esse ostentare volebat.  
 Non tulit omnipotens genitor, miseratus ab alto  
 Conatus, totaque senex quae nocte precatus  
 Ante Deum fuerat, rectis ea vota feruntur  
 Passibus, et coeli nubes et sidera tranant.  
 Mane erat, et magna jamjam se mole ferebat  
 Ille furens fastu, tantorum et causa malorum:  
 Atque illum templo subitum haud parva caterva  
 Pone sequebatur gradientem et multa minantem.  
 Ecce autem subitum atque omni mirabile seculo  
 Evenit monstrum, tota dolor ortus in alvo,  
 Quaerere recessus jubet, et se avertere coetu.  
 Hic illum (auditis si quicquam credimus) ingens  
 Occupat attonitum terror, formidine tacta  
 Mens stupet, et scelerum intuitu, culpaque nocentis  
 Contrahitur, miseramque animam vis strangulat intus  
 Mortifera, atque illum constringit et urget inhaerens,  
 Illa rumpuntur post haec: mox exita latebras

Projicit in foedas, furisique vocantibus atria,  
 Indignantem animam tristi cum murmure fundit.  
 Hoc fine ille miser Libycae telluris alumnus  
 In torris vitam clausit, dum bella movebat  
 Impia, Christo adimens divinae stirpis honorem.  
 Vos o quos illi similes videt auricomus Sol,  
 Quis idem furor est eademque insaniam, Christo  
 Adversos vos ferre Deo: quique usque perosi  
 Accensam verbi lucem, immortale sonantis  
 Auxilium mundo, varias exquiritis artes  
 Nequiquam superos contra, respicite tandem  
 Si pote, et in melius mutatos vertite currens.  
 Neu dubitate Deum memorem fandi atque nefandi.  
 Fraus unde exorta est, in eum plerumque redundat,  
 Et quamquam lentis ad poenam passibus iras  
 Procedunt superum, gravitas tamen omnia pensat  
 Supplicii, mora quae pridem disturna neglexit.  
 Tu quoque qui laceras lingua petulante Molemum  
 Chemnicium, et reliquos adeo, quae plurima turba est,  
 Seu te deceptae mentis malus impulit error,  
 Quo tua te primis Hispania tinxit ab annis.  
 Anolla Ausonii dum manuit esse Baalis,  
 Quam Christi populus: sive hoc fiducia suavit  
 Ingenii, seu spes magnorum hortatur honorum  
 Ponere respectum veri, et mendacia furo  
 Pingere, sive aliud causae est tibi: Tu quoque tandem  
 O tandem leve studium hoc o exue mentis.  
 Aspice deformes obitus immanis Aarii:  
 Aspice quae nostra contingunt plurima seculo:  
 Aspice mugitus Latoni sub morte fatentis  
 Ezosam ob verbi lucem se judicis alti  
 Horrendo jussu morientem ad tristitia mitti  
 Tartara, perpetuis huius ut facta impia poenis,  
 Tristitiaque aeternum furiarum verbera plorat.  
 Nec vero ut vester vita emigraverit olim  
 Hofmeisterus et huic similes, devota perenni  
 Exilio capta, te posse latere putandum est,  
 Utque alii similes, manet, aeternumque manebit  
 Accensum mundo lumen: quantumlibet illud  
 Oppugnet vafra stygii Caecodaeomonis arte.  
 Turba furens undis, ferro, face, voces, librisque,  
 Et venit tandem illa dies, qua quomque sequuntur  
 Praemia pro factis, mundi sub iudice magno.  
 Tum meliora piis vera vice currere fata  
 Incipient: dextra lachrymas tunc ipse suorum  
 Deterget pater, et mundi ludibria deinceps  
 Passuros nunquam mundo meliore fovebit  
 Aeternum, vera tum flebit barbara sorte  
 Impietas, tunc in fletus haec gaudia abibunt,  
 Omnia tunc in lucem, antehac caelata, ferentur,  
 Tuque adeo quondam regnata tricipite tellus  
 Geryone, ac graviore tyrannide nunc quoque pressa  
 Geryonis Latii: quem fanda nefanda patrantem  
 Alcides pridem invictis Germanicus armis  
 Instigante Deo, coelesti numine plenus  
 Elisit, coecumque orbi soelus omne retezit,  
 Maximus ille animi gestorum maximus ille  
 Martinus (quid vane fremis, quid ringere livor,  
 Maximus ille tamen) quo sese Saxonis ora  
 Jactitat, et jactabit in aerum nobilis omne  
 Tu tellus Hispana, inquam, nunc aspice demum  
 Exortam mundo lucem: et Tyrynthius ut te  
 Barbarico eripuit fastu pastoris Iberi:  
 Sic et nunc vobis aliquando petentibus aetas  
 Auxilium ferat et furis tandem eximat huius  
 Qui regnum Europae atque Asiae Lybiaeque calentis,  
 Sperabat, captasque impune hinc inde per urbes  
 Ibat ovans, et divino gaudebat honore  
 Jus regum et claves alti gestabat Olympi.  
 Hoc me nunc vobis Pietas jubet alma precari:  
 Hoc vobis donet cupientibus astrapotens rex.

FINIS.

**PRIMA PARS**

**EXAMINIS DECRETORUM CONCILII TRIDENTINI**

**COMPLECTENS EXPLICATIONEM LOCORUM:**

*De Traditionibus.*  
*De Peccato originis.*  
*De Concupiscentia.*  
*De vocabulo peccati.*  
*De Conceptione B. Mariae Virginis.*

*De Operibus infidelium.*  
*De Libero Arbitrio.*  
*De Justificatione.*  
*De Fide.*  
*De bonis Operibus.*

**AUTORE**

**MARTINO CHEMNICIO, D.**

---